



GRUPO PROVINCIAL

V-32244006

xosebaltar@bng.gal

Bernardo Varela López, voceiro do grupo provincial do BNG; María Mangana Guede e Xose Manuel Puga González deputados do grupo provincial do BNG na Deputación de Ourense, ao abeiro da Lei da Administración Local de Galiza e demais disposicións concordantes presenta a seguinte **MOCIÓN para a defensa da sanidade pública galega e especialmente en Ourense**

EXPOSICIÓN DE MOTIVOS

A situación da sanidade pública en Galicia, e especialmente en Ourense, é particularmente preocupante no inicio deste ano 2024.

As políticas aplicadas polo Partido Popular desde 2009 até hoxe reflexan un nefasto balance en todos os aspectos:

- Listas de agarda inasumibles, especialmente en determinadas especialidades.
- Unha Atención Primaria desatendida e abandonada.
- Política de Persoal de total desprezo e precarización do corpo de traballadores/as deste sistema público. O cal incentiva a fuga de persoal.
- Privatizacións (algunhas delas encubertas) de servizos.
- Medios de transporte e infraestruturas sanitarias en estado deplorable.

Na provincia de Ourense estamos a comprobar actualmente os resultados desa desatención e abandono do PP á nosa sanidade pública.

Sendo conscientes da complexidade da pluripatoloxía das poboacións máis avellentadas das comarcas de Ourense, tamén é certo que son as menos poboadas do conxunto de Galiza.

Especialmente desoladora son as interminables listas de agarda, por máis que se impida unha análise rigorosa do conxunto destas xa que se oculta a información real ao eliminar a todas aquelas persoas que son chamadas para ofertárenlle unha derivación á privada. Se a persoa consultada rexeita este recurso, o goberno galego elimínana da estatística como se a súa situación estivese “resolta” e esa persoa non seguisse agardando. Ademais, cómpre ter en conta unha práctica, normalizada en moitas especialidades e centros, consistente en indicar á ou ao paciente que “será citado ou citada telefonicamente” deixando a cita “en buzón”. Polo tanto, podemos afirmar que estes datos de listas de agarda están trucados e son, polo tanto, maiores do que recoñece o goberno galego.

Aínda así segundo os propios datos do SERGAS, o Complexo Hospitalario Universitario de Ourense reflicta os peores datos de toda Galiza. E, en termos xerais, aínda que a situación nos hospitais comarcais de Verín e Valdeorras é lixeiramente mellor por falla de servizos e especialidades, a área sanitaria de Ourense, Verín e Valdeorras volve rexistrar os peores tempos de toda Galiza.

Para facernos mellor unha idea: no conxunto da área había ao peche do primeiro semestre do ano pasado 34.752 pacientes agardando unha consulta cun tempo medio de 108,6 días fronte aos 62,9 días de media do conxunto de Galiza, dos que 21.385 levaban tres meses de agarda, 7.561 entre 3 e 6 meses, 3.163 entre 6 e 12 e 2.643 máis de 12.

No referente á atención primaria, podemos destacar a saturación de todos os centros de saúde da provincia, e tamén dos PAC.

A falla da posta en marcha do Plan de Mellora de Atención Primaria para facela atractiva para as e os profesionais, para que poidan dispor dos recursos, tempo, número de doentes, é unha das causas do colapso.

Galiza é a penúltima do estado en investimento en Atención Primaria, só o 11.8% fronte á unha media do 14.2%. Tense producido un recorte orzamentario entre 2009 e 2024 en atención primaria de -2.193.390.705 € mentres que o acumulado de atención hospitalaria e de + 5.389.767.571 €. Aplicando a inflación, a atención primaria tería que ter 473 millóns de euros máis anualmente.

Máis alá de “picos puntuais” (por outra parte previsibles) como está a acontecer no meses de decembro e xaneiro, esta saturación leva sendo denunciada, xa non só polo BNG, senón tamén por pacientes e profesionais de Ourense. Varias teñen sido as renuncias ou dimisións que se teñen producido en cargos intermedios do Sergas na nosa área sanitaria.

Na mesma cidade de Ourense, hai citas de medicina xeral que se están a dar para 7 días ou máis, para revisións ordinarias..... o que acaba por saturar tamén o servizo de URXENCIAS.

Boa parte da culpa desta situación recae na política organizativa e de persoal que a Xunta de Galiza realiza.

É imposible atender centros de saúde nos que os profesionais (medicina ou enfermería) teñen que atender até 2.500 cartillas (é dicir: pacientes).

Todo ten que ver co modelo de **sanidade privatizada que defende o Partido Popular**. Os orzamentos da Xunta para 2024 en materia de sanidade non contemplan medidas para o cambio de rumbo precisos para reverter estas consecuencias: aumentan por debaixo da media do conxunto do orzamento da Xunta, mentres este aumenta o 5%, o de sanidade só o fai un 3.99%, atención primaria aínda menos, o 3.69% e representa menos porcentaxe no conxunto do orzamento.

O aumento da partida co capítulo I (gasto de persoal) equivale ás actualizacións salariais e a compromisos acadados en mesa sectorial, a carreira profesional e o pago da exclusividade aos que traballan na privada, que nin moito menos recollen o groso das demandas. **Non hai aumento de profesionais**, as prazas que anuncian son de estabilización, (o que mostra a enorme temporalidade existente) **non son novas prazas**.

Esa “carreira privatizadora” ten en Ourense un engadido: a concentración en mans dun grupo madrileño (Recoletas) dos centros privados que operan en Ourense (Cosaga e O Carmen). Práctica de monopolio que irá no detrimento de profesionais e pacientes ourensáns.

A atención privada pode coexistir mais non fagocitar á sanidade pública. E para elo é responsabilidade da administración defender, mellorar e priorizar a sanidade pública.

O abandono de Ourense por parte da Xunta de Galiza exemplifícase no retraso de infraestruturas como a construción de novos centros de saúde do Vinteún, Mariñamansa e A Rúa, ou de renovación do de Ribadavia, ou recentemente, deixar sen ambulancia asistencial de Soporte Vital Avanzado (SVA) á comarca de Valdeorras.

A isto compre sumarlle o intento da supresión do paritorio de Verín (impedido polas medidas de presión da cidadanía), ou o desmantelamento das unidades de pediatría de Xinzo de Limia e O Carballiño.

E por suposto á atención primaria nas zonas de montaña, como no macizo central de Ourense, no que só se deixa un facultativo para atender toda aquela ampla zona (5 concellos) obrigando a desprazarse á xente moitos quilómetros e saturando o centro de saúde da cabeceira de comarca, ou no concello de A Mezquita (que obriga ao desprazamento até A Gudiña).

En resumo, un panorama desolador.

E non; á Deputación Provincial de Ourense **non é allea**, nin irresponsable, diante de todo isto.

Queremos lembrar que é obriga das institucións provinciais, e de conformidade co establecido no artigo 36 LRBRL “a cooperación no fomento do desenvolvemento económico e social e na planificación no territorio provincial, de acordo coas competencias das demais Administracións Públicas nese ámbito” e mesmo atribúe competencias en materia de colaboración sanitaria para os concellos de menos de 5.000; máis alá da responsabilidade política que temos como representantes de veciñas e veciños

ACORDOS:

O Pleno da Deputación Provincial de Ourense asume a apoia ás seguintes demandas:

1. Denunciar diante da Xunta de Galiza a vulneración de dereitos que sofren as e os ourensáns por teren a maior lista de agarda de toda Galiza.
2. Esixir do SERGAS que na área sanitaria de Ourense, Verín e Valdeorras se aborden os problemas estruturais dos hospitais e das especialidades con maiores problemas de funcionamento, avaliando medidas para a atracción de persoal e abordando as melloras necesarias. Así como a construción e/ou reformas dos centros de saúde comprometidos: Vinteún, Mariñamansa, Ribadavia e A Rúa.
3. Instar ao Goberno galego á posta en marcha sen máis dilación do Plan de Mellora de Atención Primaria e a resolver de inmediato as carencias do servizo de pediatría nos Centros de Saúde de O Carballiño e Xinzo de Limia.
4. Reclamar do Goberno Galego a inmediata reposición de facultativos nos centros de saúde do macizo central e na Mezquita, para unha correcta atención á cidadanía. Así como dotar os PAC de equipos parellos "médico/a-enfermería" evitando que o servizo de enfermería teña que atender múltiples servizos de medicina, como ocorre no Carballiño, Ribadavia e Celanova.
5. Que a Xunta de Galiza modifique o mapa de transporte sanitario, incluíndo a dotación dunha ambulancia do SVA para a comarca de Valdeorras e reforzo noutras comarcas onde o servizo e os medios materiais e humanos é deficitario.
6. Reclamar ao Goberno Galego e ao Estatal o aumento e apertura de prazas en Medicina e M.I.R.

Ourense, 5 de xaneiro de 2024.

Asdo: Bernardo Varela López
Voceiro do Grupo Provincial do BNG

A SR. PRESIDENTE DA DEPUTACIÓN DE OURENSE